



## SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka ("Službeni glasnik BiH" broj 95/12 i 41/16), člana 25. Pravilnika o godišnjim finansijskim izvještajima političkih stranaka ("Službeni glasnik BiH" broj 96/13 i 89/16), a u skladu sa članom 18. Pravilnika o administrativnim procedurama pregleda, kontrole i revizije finansijskih izvještaja političkih stranaka ("Službeni glasnik BiH", broj: 103/08), izdajem

### IZVJEŠTAJ O REVIZIJI GODIŠNJEG FINANSIJSKOG IZVJEŠTAJA ZA 2015. GODINU **HRVATSKE DEMOKRATSKE ZAJEDNICE 1990**

Broj: 03-07-6-425/16  
Sarajevo, 11. juli 2017. godine

## SADRŽAJ

MIŠLJENJE .....	3
1. UVOD .....	4
2. PREDSTAVLJANJE POLITIČKE STRANKE .....	4
3. OPIS REVIZIJE.....	5
Predmet revizije .....	5
Cilj revizije.....	5
Obim revizije.....	5
4. PRETHODNE KONTROLE I REVIZIJE.....	5
5. NALAZI I PREPORUKE .....	6
5.1. NALAZI.....	6
5.2. PREPORUKE .....	10

## MIŠLJENJE

Služba za reviziju finansiranja političkih stranaka (u daljem tekstu: Služba za reviziju) je izvršila reviziju godišnjeg finansijskog izvještaja Hrvatske demokratske zajednice 1990 za 2015. godinu.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka, te uspostavljanje efikasnog sistema internih kontrola.

Naša odgovornost je da izrazimo mišljenje na osnovu revizije koju smo izvršili.

Reviziju smo izvršili u skladu sa revizijskim standardima. Ovi standardi zahtijevaju da reviziju planiramo i izvršimo na način da prikupimo dovoljno dokaza koji nam, u razumnoj mjeri, pružaju garanciju da je stranka postupala u skladu sa odredbama Zakona o finansiranju političkih stranaka.

Revizija je na osnovu uzoraka ispitivala značajne transakcije koje potvrđuju iznose u finansijskim izvještajima, ocjenu računovodstvenih načela prilikom sastavljanja finansijskih izvještaja i postupanje u skladu sa odredbama Zakona o finansiranju političkih stranaka.

Smatramo da revizija koju smo izvršili pruža razumnu osnovu za izražavanje našeg mišljenja.

**Revizijom godišnjeg finansijskog izvještaja za 2015. godinu, utvrđeno je da je Hrvatska demokratska zajednica 1990 prekršila odredbe člana 4. stav (1), člana 5. stav (4), člana 6. stav (2), člana 11. i člana 12. Zakona o finansiranju političkih stranaka.**

**Prema našem mišljenju, osim navedenog, revidirani finansijski izvještaj ukazuje da je Hrvatska demokratska zajednica 1990 u 2015. godini postupala u skladu sa odredbama Zakona o finansiranju političkih stranaka.**

## 1. UVOD

Služba za reviziju finansiranja političkih stranaka (u daljem tekstu: Služba za reviziju) je izvršila reviziju godišnjeg finansijskog izvještaja Hrvatske demokratske zajednice 1990 za 2015. godinu.

Revizija je preduzeta u skladu sa članom 10. stav (1) Zakona o finansiranju političkih stranaka, članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da se revizija obavlja provjerama na bazi uzorka i da postoje ograničenja u računovodstvenom sistemu i sistemu internih kontrola, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja za 2015. godinu, Hrvatska demokratska zajednica 1990 se finansirala iz sljedećih izvora<sup>1</sup>:

R/B	Izvori finansiranja	Iznos (KM)	Struktura (%)
1.	Članarina	1.582,20	0,28
2.	Prilozi fizičkih lica ( 3-a )	3.272,35	0,58
3.	Prilozi pravnih lica ( 3-b )	3.000,00	0,53
4.	Prihodi od imovine ( 3-c )	12,27	0,00
5.	Prihodi od dobiti preduzeća u vlasništvu političke stranke ( 3-d )	0,00	0,00
6.	Prihodi od poklona ( 3-e )	21.540,00	3,80
7.	Prihodi iz budžeta ( 3-f )	529.907,25	93,59
8.	Prihodi od propagande ( 3-g )	0,00	0,00
9.	Ostali prihodi	6.858,18	1,21
<b>I</b>	<b>Ukupni prihodi (1-9)</b>	<b>566.172,25</b>	<b>100,00</b>
<b>II</b>	<b>Kreditno zaduženje kod banaka</b>	<b>0,00</b>	<b>0,00</b>
	<b>Izvori finansiranja (I+II)</b>	<b>566.172,25</b>	<b>100,00</b>

Prema podacima iz godišnjeg finansijskog izvještaja, stranka je ostvarila rashode u ukupnom iznosu od 578.688,60 KM<sup>2</sup>.

## 2. PREDSTAVLJANJE POLITIČKE STRANKE

Naziv političke stranke je Hrvatska demokratska zajednica 1990. Skraćeni nazivi stranke su HDZ 1990 i HDZ' 90.

Hrvatska demokratska zajednica 1990 je registrovana kod Kantonalnog suda u Mostaru, rješenjem broj: 007-0-R-06-000031 od 13.04.2006. godine.

Sjedište političke stranke je u Mostaru, ulica Kneza Branimira 2, SPC Rondo.

Lice ovlašteno za zastupanje stranke je Ilija Cvitanović, v.d. predsjednik stranke.

Lice ovlašteno za podnošenje finansijskih izvještaja za 2015. godinu je Marijana Markotić.

<sup>1</sup> Podaci iz korigovanog obrasca 3 (izvori finansiranja) godišnjeg finansijskog izvještaja za 2015. godinu, koji je dostavljen dana 06.07.2017. godine.

<sup>2</sup> Podaci iz korigovanog obrasca 4 (rashodi političke stranke) godišnjeg finansijskog izvještaja za 2015. godinu, koji je dostavljen dana 06.07.2017. godine.

Prema podacima iz godišnjeg finansijskog izvještaja za 2015. godinu, organizacionu strukturu Hrvatske demokratske zajednice 1990 čine:

- Središnji odbor HDZ 1990 Mostar,
- 7 kantonalnih/županijskih odbora,
- Organizacioni dio HDZ 1990 u Brčko distriktu BiH,
- 4 gradska odbora i
- 33 općinska odbora.

### 3. OPIS REVIZIJE

**Predmet revizije** je godišnji finansijski izvještaj Hrvatske demokratske zajednice 1990 za 2015. godinu i to sljedećih organizacionih dijelova političke stranke:

- Središnjeg odbora HDZ 1990 Mostar,
- ŽO Središnja Bosna HDZ 1990 Travnik i
- Općinske organizacije HDZ 1990 Odžak.

**Cilj revizije** je da se na osnovu provedenih revizijskih procedura pribave revizijski dokazi, koji će revizoru omogućiti da izrazi mišljenje o tome da li je Hrvatska demokratska zajednica 1990 u izvještajnom periodu postupala u skladu sa odredbama Zakona o finansiranju političkih stranaka.

**Obim revizije** finansijskih izvještaja Hrvatske demokratske zajednice 1990 obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka, odnosno usklađenosti izvora finansiranja i načina trošenja sredstava, sa posebnim naglaskom na prihode iz budžeta.

### 4. PRETHODNE KONTROLE I REVIZIJE

Pregled, kontrola i revizija finansijskih izvještaja Hrvatske demokratske zajednice 1990 vršeni su u periodu od 2006. do 2014. godine, nakon kojih su izdati izvještaji o pregledu, odnosno izvještaji o reviziji sa mišljenjem revizora, nalazima i preporukama revizije.

Nakon izvršenog pregleda za 2014. godinu, Služba za reviziju je izdala Izvještaj o pregledu godišnjeg finansijskog izvještaja stranke sa mišljenjem revizora, nalazima revizije i preporukama stranci da izdaje potvrde o primljenim priložima, da priloge prima isključivo na račun centrale stranke, da ne prima priloge koji su zakonom zabranjeni, da uspostavi adekvatne evidencije o prihodima i rashodima u svojim poslovnim knjigama, da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka i dostavlja u zakonom predviđenom roku, te da poštuje i druge propise, prevashodno poreske, iz kojih proističu dodatne obaveze i troškovi, koje politička stranka treba izmirivati i evidentirati u poslovnim knjigama i finansijskom izvještaju koji podnosi Centralnoj izbornoj komisiji Bosne i Hercegovine.

#### **Nerealizovane preporuke:**

Na osnovu uočenih nedostataka u godišnjem finansijskom izvještaju za 2015. godinu, utvrđeno je da Hrvatska demokratska zajednica 1990 nije ispoštovala date preporuke.

## 5. NALAZI I PREPORUKE

### 5.1. NALAZI

#### a) **Stranka je prekršila odredbu člana 4. stav (1) Zakona o finansiranju političkih stranaka.**<sup>3</sup>

Na zahtjev Centralne izborne komisije Bosne i Hercegovine, Hrvatska demokratska zajednica 1990 je dostavila Finansijski plan za 2015. godinu u kojem je planirala ukupne rashode u iznosu od 370.000,00 KM.

Prema podacima iz godišnjeg finansijskog izvještaja, Hrvatska demokratska zajednica 1990 je u 2015. godini ostvarila rashode u ukupnom iznosu od 573.687,60 KM.

Obzirom da je stranka finansijska sredstva koja su znatnim dijelom osigurana iz budžeta, utrošila van utvrđenog plana, prekršila je odredbe člana 4. stav (1) Zakona o finansiranju političkih stranaka.

#### b) **Hrvatska demokratska zajednica 1990 prekršila je odredbe člana 5. stav (4) Zakona o finansiranju političkih stranaka.**

Hrvatska demokratska zajednica 1990 nije u poslovnim knjigama evidentirala nenovčanu donaciju po osnovu besplatnog korištenja poslovnog prostora u Širokom Brijegu, čime je prekršila odredbe člana 5. stav (4) Zakona o finansiranju političkih stranaka.

Uvidom u akt Grada Široki Brijeg broj: 03-159/16 od 13.06.2016. godine, utvrđeno je da Hrvatska demokratska zajednica 1990 koristi prostorije u vlasništvu Grada Široki Brijeg, površine 30 m<sup>2</sup>, te da za korištenje ne plaća zakupninu.

Hrvatska demokratska zajednica 1990 je korištenjem poslovnog prostora u vlasništvu Grada Široki Brijeg, bez plaćanja zakupnine, primila nenovčanu donaciju, koju je u skladu sa Pravilnikom o godišnjim finansijskim izvještajima političkih stranaka i Zakonom o finansiranju političkih stranaka imala obavezu da evidentira u poslovnim knjigama i prijavi u godišnjem finansijskom izvještaju za 2015. godinu.

#### c) **Revizijom finansijskog izvještaja je utvrđeno da je Hrvatska demokratska zajednica 1990 prekršila odredbe člana 6. stav (2) Zakona o finansiranju političkih stranaka.**

Hrvatska demokratska zajednica 1990 prekršila je odredbe člana 6. stav (2) Zakona o finansiranju političkih stranaka jer prilozi fizičkih lica u ukupnom iznosu od 777,00 KM nisu uplaćeni na transakcijske račune Središnjeg odbora stranke.

Uvidom u izvode sa transakcijskog računa i obrasce finansijskih izvještaja utvrđeno je da su na transakcijski račun Središnjeg odbora uplaćeni prilozi fizičkih lica koji čine prihode Središnjeg odbora u ukupnom iznosu od 1.130,79 KM KM, dok prilozi fizičkih lica koji čine prihode ŽO Središnja Bosna HDZ 1990 Travnik u iznosu od 500,00 KM, OO HDZ 1990 Domaljevac-Šamac u iznosu od 20,00 KM i ŽO HDZ 1990 Sarajevo u iznosu od 257,00 KM nisu uplaćeni na transakcijske račune Središnjeg odbora stranke.

---

<sup>3</sup> Prema odredbama člana 4. stav (1) Zakona o finansiranju političkih stranaka, finansijska sredstva iz člana 3. stav (1) navedenog Zakona stranka može koristiti isključivo za ostvarivanje ciljeva utvrđenih svojim programom i statutom.

**d) Hrvatska demokratska zajednica 1990 prekršila je odredbe člana 11. i člana 12. Zakona o finansiranju političkih stranaka.**

Revizijom finansijskih izvještaja utvrđeno je da Hrvatska demokratska zajednica 1990 nije u poslovnim knjigama evidentirala sve prihode, rashode i obaveze, nije pravilno vodila blagajničko poslovanje i nije izvršila usklađivanje obaveza sa dobavljačima, čime je prekršila računovodstvene propise i odredbe člana 11. i člana 12. stav (1) Zakona o finansiranju političkih stranaka. Hrvatska demokratska zajednica 1990 nije obrasce godišnjeg finansijskog izvještaja za 2015. godinu popunila u skladu sa Pravilnikom o godišnjim finansijskim izvještajima političkih stranaka - u daljem tekstu: Pravilnik<sup>4</sup>, čime je prekršila odredbe člana 12. stav (3) Zakona o finansiranju političkih stranaka<sup>5</sup>.

(1) Uvidom u poslovne knjige Hrvatske demokratske zajednice 1990 utvrđeno je da stranka u okviru Glavne knjige vodi evidencije za sve organizacione odbore, i to na način da ažurno evidentira poslovne promjene za Središnji odbor stranke, dok poslovne promjene za niže organizacione dijelove evidentira na kraju poslovne godine, kada knjiži ukupan iznos prihoda i rashoda na analitičke kartice konta prihoda i rashoda, kao i ukupan promet po kontima računa, blagajne, osnovnih sredstava i drugih pozicija aktive i pasive.

Takođe je utvrđeno da se prihodi i rashodi nižih organizacionih dijelova uknjižavaju na osnovu podataka iz izvještaja i/ili poslovnih knjiga koje niži organizacioni dijelovi stranke dostavljaju Središnjem odboru stranke, pri čemu prethodno nije izvršena kontrola podatka koji se unose u poslovne knjige.

Ovakav način knjiženja i nedostatak internih kontrola ne pruža adekvatne podatke o приходима, rashodima, imovini i obavezama stranke, te nije moguće potvrditi podatke koji su iskazani u godišnjem finansijskom izvještaju.

- Revizijom finansijskih izvještaja ŽO Središnja Bosna HDZ 1990 Travnik utvrđeno je da ovaj odbor nije vodio poslovne knjige, te da je Središnji odbor stranke na osnovu podataka iz obrazaca finansijskog izvještaja koje je popunio ŽO Središnja Bosna HDZ 1990 Travnik, uknjižio promet po transakcijskom računu i blagajni, prihode, rashode i obaveze u poslovnim knjigama Središnjeg odbora. Služba za reviziju je izvršila kontrolu pojedinih vrsta troškova (troškova donacija, električne energije i prevoza) i utvrdila da stranka ne posjeduje dokumentaciju (račune) na osnovu koje su iskazani troškovi. Imajući u vidu navedeno, nije bilo moguće utvrditi da li su u finansijskom izvještaju troškovi ovog odbora pravilno iskazani.

- Općinski odbor HDZ 1990 Odžak je vodio poslovne knjige, ali podaci o приходима i rashodima koji su uknjiženi u poslovne knjige Središnjeg odbora i iskazani u godišnjem finansijskom izvještaju koji je dostavljen Centralnoj izbornoj komisiji Bosne i Hercegovine ne odgovaraju podacima iz poslovnih knjiga OO HDZ 1990 Odžak.

Kontrolom ostalih troškova koji su u obrascu 4.1 OO HDZ 1990 Odžak i Glavnoj knjizi Središnjeg odbora iskazani u iznosu od 298,39 KM, utvrđeno je da navedeni troškovi nisu pravilno iskazani. Prema računima dobavljača „Mimoza-2“ d.o.o. utvrđeno je da su ostali troškovi iznosili 410,00 KM, koliko je u svojim poslovnim knjigama i iskazao OO Odžak. Takođe je utvrđeno da je Središnji odbor evidentirao troškove reprezentacije u iznosu od 485,18 KM, dok su u poslovnim knjigama OO HDZ 1990 Odžak ovi troškovi evidentirani u iznosu od 1.818,00 KM.

Uvidom u dokumentaciju ovog odbora, utvrđeno je da su troškovi knjiženi na osnovu uplatnica i nakon sravnjenja salda sa dobavljačima. S obzirom da poslovne promjene nisu evidentirane ažurno i na osnovu adekvatne dokumentacije, te da evidencije koje se vode u poslovnim knjigama Središnjeg ureda ne odgovaraju podacima iz evidencija OO HDZ 1990

<sup>4</sup> „Službeni glasnik BiH“ broj: 96/13.

<sup>5</sup> „Službeni glasnik BiH“ broj: 95/12.

Odžak, nije bilo moguće utvrditi da li su rashodi koje je u godišnjem finansijskom izvještaju iskazala stranka za ovaj organizacioni dio pravilno iskazani.

- Kontrolom salda obaveza prema dobavljačima na dan 31.12.2015. godine, utvrđeno je da stranka nije u svojim poslovnim knjigama pravilno iskazala obaveze prema dobavljaču „Europlakat BH“ d.o.o. Sarajevo.  
Stranka je u poslovnim knjigama iskazala obaveze prema pravnom licu „Europlakat BH“ d.o.o. Sarajevo u iznosu od 54.194,50 KM, dok prema podacima iz Izvoda otvorenih stavki, obaveze stranke prema ovom pravnom licu na dan 31.12.2015. godine iznose 42.494,50 KM.  
Uvidom u analitičku karticu potraživanja pravnog lica „Europlakat BH“ d.o.o. Sarajevo od Hrvatske demokratske zajednice 1990 za period 01.01.-31.12.2015. godine, utvrđeno je da je „Europlakat BH“ d.o.o. izvršio otpis svojih potraživanja u iznosu od 11.700,00 KM, i to na osnovu Knjižne obavijesti 007/15 od 24.04.2015. godine.  
S obzirom da stranka nije imala obavezu da plati dio obaveza prema dobavljaču, ostvarila je prihode u iznosu od 11.700,00 KM, koje nije evidentirala u poslovnim knjigama.
- (2) Poslovne knjige Hrvatske demokratske zajednice 1990 nisu vođene u skladu sa aktualnom osnovom po kojoj se prihodi i rashodi priznaju u momentu nastanka, a ne u momentu plaćanja, odnosno naplate, što za rezultat ima pogrešno iskazane rashode stranke u poslovnim knjigama i godišnjem finansijskom izvještaju.

Uvidom u račune dobavljača „Media Res“ i „Elite media“, utvrđeno je da je Središnji odbor stranke troškove nastale po osnovu kampanje za Opšte izbore 2014. godine u ukupnom iznosu od 69.755,00 KM evidentirao u poslovnim knjigama i iskazao u godišnjem finansijskom izvještaju za 2015. godinu kao troškove tekućeg perioda. Takođe je utvrđeno da u finansijskom izvještaju za 2014. godinu nisu iskazani troškovi reklame OO HDZ 1990 Odžak u iznosu od 526,50 KM i troškovi prevoza ŽO Središnja Bosna HDZ 1990 Travnik u iznosu od 409,50 KM.

- (3) Revizijom finansijskog izvještaja utvrđeno je da stranka nije u poslovnim knjigama evidentirala promet gotovog novca na osnovu blagajničkih izvještaja, što za rezultat ima pogrešno iskazane podatke o prometu ostvarenom putem blagajne OO HDZ 1990 Odžak u obrascu 2-1 (pregled stanja blagajne) godišnjeg finansijskog izvještaja, čime su prekršene odredbe člana 12. Pravilnika.

Stranka je u okviru Glavne knjige Središnjeg odbora evidentirala početno stanje novca u blagajni OO HDZ 1990 Odžak u iznosu od 6.168,00 KM, promet ulaza u iznosu od 3.000,00 KM, te promet izlaza u iznosu od 9.168,00 KM, što je i iskazano u obrascu 2-1 godišnjeg finansijskog izvještaja.

Služba za reviziju je utvrdila da OO HDZ 1990 Odžak nije sačinjavao blagajničke izvještaje i da u poslovnim knjigama koje je vodio odbor nije evidentiran promet ostvaren putem blagajne. Takođe je utvrđeno da je OO HDZ 1990 Odžak sačinio interni obrazac 2, koji nije dostavljen Centralnoj izbornoj komisiji Bosne i Hercegovine, u kojem je iskazao sljedeće podatke o prometu gotovog novca putem blagajne: ukupan promet ulaza u iznosu od 2.979,91 KM i ukupan promet izlaza u iznosu od 2.979,91 KM<sup>6</sup>.

Revizorima Službe za reviziju je u toku obavljanja revizije dostavljeno Obrazloženje Predsjednika OO HDZ 1990 Odžak u kojem je navedeno da ne raspoložu dokumentacijom iz

---

<sup>6</sup> U godišnjem finansijskom izvještaju iskazana je obaveza OO HDZ 1990 Odžak po osnovu pozajmice od Drage Zečevića u iznosu od 3.399,34 KM. Kontrolom poslovnih knjiga koje je vodio ovaj odbor utvrđeno je da obaveze po osnovu kratkoročnih pozajmica na dan 31.12.2015. godine iznose 3.399,34 KM i knjižene su na osnovu računa, a na ne osnovu uplaćenog novca u blagajnu.



ranijih godina, te da nisu zatekli novac koji je evidentiran u Glavnoj knjizi Središnjeg odbora na kontu blagajne OO HDZ 1990 Odžak u iznosu od 6.168,00 KM. Na osnovu ovog dokumenta je Središnji odbor isknjižio početno stanje novca u blagajni na dan 01.01.2015. godine u iznosu od 6.168,00 KM, na teret rashoda iz ranijih godina. Stranka nije evidentirala manjak novca, niti je za utvrđeni manjak teretila blagajnika.

- (4) Služba za reviziju je utvrdila da stranka nije u poslovnim knjigama za 2015. godinu evidentirala sve troškove zakupa poslovnih prostora, tako da su u poslovnim knjigama ukupni rashodi i obaveze stranke na dan 31.12.2015. godine iskazani u manjem iznosu u odnosu na ostvarene.

Kontrolom troškova zakupa utvrđeno je da su troškovi zakupa poslovnih prostora iskazani u manjem iznosu u odnosu na ugovorenu cijenu zakupa za ŽO Soli Tuzla i općinske odbore HDZ 1990 Neum, Šamac, Čapljina, Vitez, Bugojno, Bihać i Gornji Vakuf-Uskoplje u iznosu od 8.850,00 KM<sup>7</sup>.

- (5) Hrvatska demokratska zajednica 1990 nije u poslovnim knjigama i godišnjem finansijskom izvještaju iskazala troškove i obaveze po osnovu poreza na dohodak i doprinosa na sredstva koja su Središnji odbor i ŽO Središnja Bosna isplatili fizičkim licima.

Kontrolom troškova zakupa poslovnih prostora utvrđeno je da Središnji odbor plaća zakup stana koji koristi fizičko lice na osnovu Ugovora o zakupu, te da je u toku 2015. godine po ovom osnovu isplatio sredstva u ukupnom iznosu od 2.400,00 KM. Stranka na isplaćena sredstva koja imaju karakter ličnog primanja, nije u skladu sa preskim propisima obračunala porez na dohodak niti doprinose.

Uvidom u izvode sa transakcijskog računa ŽO Središnja Bosna HDZ 1990 Travnik utvrđeno je da je ovaj odbor izvršio isplate pomoći fizičkim licima u ukupnom iznosu od 3.740,00 KM. Uvidom u poslovne knjige Središnjeg odbora, utvrđeno je da na isplaćena sredstva nisu obračunati niti isplaćeni porez na dohodak i pripadajući doprinosi.

Stranka je u skladu sa poreskim propisima bila obavezna da na isplaćena sredstva fizičkim licima, koja imaju karakter ličnih primanja, obračuna porez na dohodak i doprinose, te da iskaže troškove u poslovnim knjigama i finansijskom izvještaju koji je podnijela Centralnoj izbornoj komisiji Bosne i Hercegovine.

- (6) Hrvatska demokratska zajednica 1990 je u korigovanom obrascu 5 (obaveze) godišnjeg finansijskog izvještaja iskazala obaveze na dan 31.12.2015. godine prema sljedećim dobavljačima: „Auto Lijanovići“ d.o.o. Mostar u iznosu od 8.604,00 KM, „Media Res“ Mostar u iznosu od 81.105,20 KM, „Europlakat BH“ d.o.o. Sarajevo u iznosu od 42.494,50 KM, Općini Gornji Vakuf-Uskoplje u iznosu od 300,00 KM i Gradu Bihać u iznosu od 435,82 KM. Stranka, međutim, nije u poslovnim knjigama za 2015. godinu iskazala tačne podatke o obavezama prema navedenim pravnim licima.

---

<sup>7</sup> Stranka je u korigovanim obrascima rashoda godišnjeg finansijskog izvještaja koji su dostavljeni 06.07.2017. godine iskazala troškove zakupa poslovnih prostora koje su koristili navedeni odbori.

## 5.2. PREPORUKE

*Preporučuje se Hrvatskoj demokratskoj zajednici 1990 da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:*

- *da vodi evidencije o prijemu priloga,*
- *da se, u skladu sa članom 6. stav (2) Zakona, prilozi uplaćuju na transakcijski račun Središnjeg odbora stranke,*
- *da poslovne knjige vodi u skladu sa računovodstvenim propisima, odnosno da vodi potpune evidencije o prihodima, rashodima i obavezama,*
- *da finansijske izvještaje koje podnosi Centralnoj izbornoj komisiji Bosne i Hercegovine popunjava u skladu sa Pravilnikom o godišnjim finansijskim izvještajima političkih stranaka,*
- *da vodi pomoćne knjige blagajne (sačinjava blagajničke izvještaje, naloge naplate i isplate), te da isplatu gotovog novca iz blagajne vrši na osnovu ispravnih knjigovodstvenih isprava. Poslovanje blagajne treba urediti tako da se razgraniče dužnosti odobravanja isplate, evidentiranja i isplate gotovine uz prethodno definisanje visine blagajničkog maksimuma,*
- *da izvrši usklađivanje obaveza sa dobavljačima i provede odgovarajuća knjiženja u poslovnim knjigama,*
- *da definiše postupke i procedure internih kontrola u vezi sa procesom trošenja finansijskih sredstava stranke i*
- *da poštuje i druge propise, prevashodno poreske, iz kojih proističu dodatne obaveze i troškovi, koje politička stranka treba izmirivati i evidentirati u poslovnim knjigama i finansijskom izvještaju koji podnosi Centralnoj izbornoj komisiji Bosne i Hercegovine.*

### **KOMENTAR:**

U ostavljenom roku, Hrvatska demokratska zajednica 1990 je dostavila odgovor na Preliminarni izvještaj o reviziji godišnjeg finansijskog izvještaja za 2015. godinu. Stranka je uz odgovor dostavila i ispravljene obrasce finansijskog izvještaja, čime je djelimično otklonila nedostatke u popunjavanju izvještaja.

Služba za reviziju je uvažila sve argumentovane primjedbe stranke, pa je u skladu sa istima korigovala nalaz revizije.

Šef Odsjeka za revizijske poslove, revizor

Sanja Tošović

Pomoćnik revizora

Anela Burdžović Kapić

Šef Službe za reviziju

Mr sc. Hasida Gušić